

枕亞新著

浪墨四集


天晴題



民國二十二年三月四版

枕亞浪墨四集一冊

定價大洋壹元



著者 海虞徐枕亞

編輯者 海虞徐天嘯

發行者 枕霞閣

印刷者 清華書局

總發行所 清華書局

上海交通路一百〇一號

枕亞浪墨四集目錄

卷一

清史拾遺

卷二

嘈騰室叢拾

卷三

孤村喋血記

卷四

趣聞百詠

卷五

啞啞錄

卷六

剖腹記

卷七

庚詞選存

枕亞浪墨四集卷一

清史拾遺

沈文肅夫人

沈文肅公葆楨。其夫人林文忠公則徐女也。淵源家學。有應變才。文肅公以編修改官御史出知九江府。郡久淪於粵寇。曾文正公檄充營務處。咸豐六年署廣信府。時列郡皆陷。惟贛及廣信僅存。詔督學侍郎廉兆綸典信防。侍郎赴郡屬之河口。勸民輸餉。以文肅從。楊輔清率衆萬餘。自吉安破新城瀘溪金谿。連陷貴溪弋陽。防軍敗績。廣信岌岌。文肅公兼程返郡。至則城門洞開。官吏軍民走且盡。夫人先遣子女僕婢去。刺指血書致饒將軍廷選乞援。及文肅公至。乃謂公曰。此去玉山九十里。有浙將饒總兵廷選駐軍二千人。饒公吾父舊部。或可乞援。文肅公持書出牙門。見有鄉民入城者。重賞令馳投。鄉民見太守待賊自盡。咸感奮。許代募壯丁數百守城。文肅公與夫人親自登陴。夫人并脫釵釧犒軍。自繡旗幟曰鄉團。會大雨。寇至興安。而饒軍已與鄉勇入城矣。時

諜者方報城中空虛。及至見城上遍樹旌旗。大驚。以爲將軍從天而下也。斬諜者。然饒所部僅千人。楊輔清率驍悍萬人至。用巨礮轟城。隨營文武皆洶懼。請于饒曰。吾屬奉檄守浙境。廣信存亡。非吾事也。今賊將以地道轟城。兵少不能支。城旦暮破。將死之乎。且使廣信幸存。賊以全力東趨。兩浙瓦解。誰職其咎。宜潛師夜出。退保浙境。遲無及矣。饒怒叱之曰。君等却何如勿來。今我在城中。賊不知我虛實。以爲我能援廣信。後路必有大軍。舍廣信趨浙。恐前後受敵。必不出此。若棄城遁。我在虜目中。一一可數。情見勢絀。尙何浙境之可保耶。遂與裨將賴高翔畢定邦出戰。凡七捷。輔清遂解圍去。時值中秋。守令欲治觴爲饒將軍慶。不可得。並巡城燈燭亦無之。幸明月如晝。星斗斂耀。饒與文肅公夫婦倚堞望賊壘。悄然無聲。將軍命去刁斗。與文肅公淪茗清談。飄飄然作廣寒宮闕之想。卒以退賊。文肅因此名聞天下。曾文正公上沈氏夫婦城守狀。謂軍興有年。郡縣望風逃潰。惟沈氏獨伸大義於天下。好事者繪圖演爲傳奇以記其事。予友饒君炳元係饒壯勇公廷選孫也。家藏夫人血書。裝潢爲小幅。一時名流如曾文正胡文忠皆有題跋。其辭曰。將軍漳江戰績。嘖嘖人口。里曲婦孺莫不知海內有饒公矣。此將

軍以援師得名於天下者也。此間太守聞吉安失守之信。豫備城守。偕廉侍郎往河口。籌饗招募。但爲勢已迫。招募恐無及。縱倉卒得募而返。驅市人而戰之。尤爲難也。頃來探報。知昨日貴溪失守。人心皇皇。吏民鋪戶。遷徙一空。署中婢僕。紛紛告去。死守之義。不足以責此輩。只得聽之。氏則倚劍與井爲命而已。太守明早歸郡。夫人二人。荷國厚恩。不得藉手以報。徒死負咎。將軍聞之。能無心惻乎。將軍以浙軍駐玉山。固浙防也。廣信爲玉山屏蔽。賊得廣信。乘勝以抵玉山。孫吳不能爲謀。賁育不能爲守。衢嚴一帶。恐不可問。全廣信即以保全玉山。不待智者辨之。浙省大吏。不能以越境咎將軍也。先宮保文忠公奉詔出師。中道齎志。至今引爲心痛。今得死此。爲厲殺賊在天之靈。實式憑之。鄉間士民。不喻其心。以輿來迎。赴封禁山避賊。指劍與井示之。皆泣而去。太守明晨得餉歸後。當再專牘奉送。得拔隊確音。當執纓以犒前部。敢對使再拜。爲七邑生靈請命。昔睢陽嬰城。許遠亦以不朽。太守忠肝鐵石。固將軍所不吝與同傳者也。否則賀蘭之師。千秋同恨。惟將軍擇利而行之。刺血陳書。願聞明命。此書未載入文肅公集中。而平江李元度先正事略。則僅載血書事。惟云與文肅公計後。乃刺血作書。與書中所云。

太守明早歸郡。語不符。或李氏所記有誤耶。抑書既作就。待文肅至而後發耶。是不可考矣。今姑從先正事略書其事。而書中所云。則出於饒氏所藏原本。事跡略有未符。不妨存疑耳。

張炳垣與其妻趙氏

江甯諸生張炳垣。當太平據江甯之際。仕洪氏司文牘。後通款大營。事泄被鞠。誅求同謀。妻趙氏。名綰。字印華。夙工文翰。聞夫被拘。憤甚。繼念徒死無益。不如密攀多人。以緩夫死。卽計不就。亦可借以報夫仇。乃作書稿。藏懷袖中。僞爲與其戚串某氏。在僞宮司筆札者。其辭云。昨得向營密札。已派其心腹某某等。改裝入天保城。予夫處亦暗中布置。聯絡衆義士預備接應。准於明夜三鼓大舉起事。惟譚紹洋（譚紹洸弟）黃文玉（黃文金弟）處未及傳知。欲遣謀去。又恐逼近東府。機事不密。則害成。故未敢輕於一試。然爲時已迫。譚黃皆當一面之人。豈可不隱通呼吸。再四焦思。忽觸念義姊智勇足備。久懷反正血忱。且出入東府無禁。此實天之巧爲位置。留姊以通綫索也。卽煩密告譚黃。先期戒備。明夜三鼓。聽城外連珠砲響。城內吹海螺聲。卽速戮守堞之賊。向營自

有大隊接應。萬慎萬密云云。及楊秀清鞠訊炳垣時。逮趙氏勘問。得此書。趙氏故作乞哀狀。秀清幾爲所惑。欲盡誅譚黃。及其左右之被攀誣者。諸會疑駭。不知所出。卒察出書中破綻。趙氏與炳垣均被極刑。或云其所謂義姊者。卽洪氏所寵傳鸞祥。金陵女子。爲洪氏所嬖。掌洪宮制誥者。傅氏亦幾以此獲譴。世傳傅氏有上天王啓云。司理宮制誥事。待罪妾傳鸞祥。謹上啓天王陛下。竊臣妾以蒲柳之姿。過蒙恩寵。奉侍無狀。深懼干犯天威。致罹重譴。乃承覆幬鴻慈。曲宥臣妾。僅予貶居曲院。由二月初五日旨下。迄今已逾二十日矣。嗟嗟。望昭陽之日影。愧玉顏不及寒雅。瞻太液之波光。倚修竹自憐翠袖。方謂長門寂寂。度夜如年。永巷沈沈。見天無日。乃蒙宮婢林小紅傳旨垂問。謂某氏函札。係屬栽誣。并賜鮫帕一方。明珠一粒。祇領之餘。感繼以泣。昔江采蘋答明皇有云。長門鎮日無梳洗。何必珍珠慰寂寥。妾則以爲寂寥之慰。陛下非明皇也。况鮫帕爲千絲織就。含纏綿宛轉之思。明珠非九曲穿成。寓皎潔光明之意。臣妾何人。敢蒙垂念。謹獻上指甲一枝。青絲一縷。以表妾悔罪之忱。以示妾感恩之意。謹啓云云。蓋亦爲此事得罪而作也。

京口駐防將士祭海都統文

道光壬寅六月。英兵破吳淞。入長江。陷鎮江。總督牛鑑令沿途州縣。不許開礮。遺之牛羊。故所過無不揚航直駛。如入無人之境。時京口駐防副都統海琳。爲滿洲親貴。牛不敢令其款敵。亦不遣人告以敵情。敵兵已至江陰。逼近鎮江。海未知也。海故闔茸。新納一姬。先期已送往他處。預備臨急時。隻身脫逃。而又疑城中漢人頗甚。一概目爲漢奸。調青州駐防旗兵入城。該旗兵本駐守鎮江東碼頭礮臺者也。勇而善戰。海恃以無恐。遂嚴閉四城。不許人民逃出。城中洵懼。食盡刼掠頻聞。皆不顧。復下令大捉漢奸。旗兵遇他縣人在城者。及居人隻行或夜出者。見卽追而殺之。又捕城內外居民百七十餘人於小教場行刑。并及婦人孺子。呼冤之聲不絕。斬至十三人。聞英船陡至。乃止。時六月九日也。知府祥麟與海固嫺婭。知人民冤。亦無可如何。知縣錢燕桂。訊釋數人。卽指錢爲大漢奸。逐之出城。不許入。十四日城破。英兵攻城時。適城北有一繩梯。乃駐防兵。縋人出城。藉以索重賞者。忘撤去敵兵。遂攀援以登。開北城。納大隊入。駐防兵聞礮。卽逃。青州兵巷戰不敵。然兩軍均有死傷。海聞城破。踉蹌向南門奔。知府祥麟隨之。請開

城出難民不許反以槍擊難民蓋欲一人乘隙而逃避處分也其計亦狡也矣祥麟憤甚赴縣學自縊書吏解其懸負入舟中而蘇奔丹陽後以失城罪與縣令錢俱拿問伏法海竟不知下落或曰爲僧矣先是海每日殺人欲逐戶搜殺漢奸又令青州兵前導殿以本營兵巡行四門逢人卽殺青州兵當移駐城中時城樓大觀樓僧欲他徙其隊長留之仍爲住持六月十三日侵晨忽呼僧起告以故令速行縋之出城僧與北固山僧善告以城中漢人將盡且趣之行時英船泊北固山下語爲一通事所聞告之英提督英提督曰我等在此待和議耳不速破城恐反害百姓遂決意破城入旗營逐都統海家屬住金壇遣人報海於城破時殉節得旨照都統賜卹在京口建專祠御史黃宗漢彈其誣殺良民報死不實追回卹典命督撫查復丹徒人顏崇禮夙爲通事時以議和事有功得議敘具狀言海在署內燒死廨宇骸骨雖燼而所著藍紗袍及所戴玉耳環尙未全燬可證督撫據此覆奏得賜卹如故不知海聞警前數日早已改易裝束衣便服不敢一日居署中移至吉祥寺安牀佛殿後居住其署中所遺袍環固非隨身物也得卹後京口駐防將士爲文以祭海聞出某名士手中寓微辭駐防將士不知其筆

有風霜也。竟用之一時。傳爲笑柄。予曾於予友丹徒牛君處見之。茲錄其文曰。維道光二十有二年冬十有一月某日。京口駐防將士某某等。謹以清酌庶羞之薦。致祭副都統海公之靈。曰。嗚呼公。至今日殆已不克終其天年。當英兵之犯我城闕也。目擊我公之惶遽。禍將不止於播遷。乃走城闔而不得。卒能黃冠草履。由問道而獲全。是則我公之大幸。深合於古人趨避之微權。方意禍亂既平。仍歸幕府。擁旄仗節。不失富貴。於從前孰意衆口沸騰。不樂我公之生。還必欲置之地死而後快焉。豈民心之殘忍。抑公運之屯譴。蓋公有不得不死者三。不容不死者五。亦事理之所必然。嗚呼。自公之作鎮京口也。移氣體則車馬宮室。養威重則鼓吹笙旃。自在優閒。久享太平之俠樂。流離奔走。爭禁曠野之風烟。公之不得不死者一也。况復鬚髭既割矣。恆引鏡以自憐。服其變矣。悲翎頂之永捐。猶且畏首畏尾。更無餘地。以周旋公之不得不死者二也。尤可痛者。時當搶攘。新購婢娟。聊寄情於少艾。冀稍緩乎憂煎。今則營空不返。鏡破難圓。馬革縱賒。夫生命蠶絲不盡。其纏綿公之不得不死者三也。然以我公之遇變。不驚守身如玉。未嘗不忍。尤攘詬以冀性命之少延。無如公之眷屬。心目惛惛。竟衰麻而受弔。開下邑之靈。

筵公之不容不死者。又其一。重以褒卹之恩。綸既下。刼灰之餘。燼爭傳公之不容不死者。又其二。况乎白簡驚心。彌縫無計。青燐未燿。疑案終懸。公之不容不死者。又其三。幸而覓死。無據通神。有權買子。虛之鐵案。揮兒戲之金錢。與顏崇禮同具狀者十六人。顏得白銀五千。餘各得數百兩不等。措大露夫潤澤。脫其罪愆。公之不容不死者。又其四。加以靈宮大啓。鳥革翬義。烈震乎寰海。英聲薄夫雲。天公倘猶逍遙人世。寄跡林泉。則春秋享祀。執灌獻者。於何告虔。公之不容不死者。又其五也。凡茲縷縷。不能具宣。亮公既不死於兵。凶國典必死於水涯山巔。嗚呼。以公之寬和而死。鎮靜而死。智且勇而死。能不呼天而泣涕之漣漣。且夫校閱頻仍者。將帥之怯也。政刑猛厲者。威福之專也。而公則鄰郡戒嚴。初不勞軍於教練。兵丁刼掠。幾曾示辱。以蒲鞭。此我公之寬和也。能無慨想而流連。迨英兵之犯境。公則不規地險。但守城堅。任長驅而直入。惟閉壁以高眠。闐若無人。恥爭雄於一戰。靜如處女。裕深謀於九淵。此公之鎮靜也。肯多讓於前賢。若其危城既破。潰卒喧闐。公乃大呼逐賊。退走當先。都統見北門已破。遂趨南門。作得勝狀。大呼速追。冀乘勢出南門。以求脫。以泥塞門。不得啓。遽易小輪走小教場。

不知所終見朱士雲章間日記誤敵人之耳自靖民難於危顛此公之勇於奔北智脫戈鋌也抑何善敗不敗而不折一矢未絕一弦若夫畏漢奸則大驅民戮守城門則但用泥填行旅不通乎道路癸黎閉絕於市塵彼島夷之問謀卽欲伺隙而無緣此皆公之神謀獨運迥出乎孫吳教戰之篇是故城之陷也絕無奸人內煽祇英兵之數千至今經故壘歷城墻深感於我公之仁讓未嘗冒犯乎英船俾城中之編戶不遭鯨鯢之屠戮猶得庇風雨於數椽設當衝鋒海上拒敵江邊則英且將洩忿於百姓而流血成川諸凡盛美詢非筆墨之所能罄恐見遺於史氏之青編我將大書深刻銘片石以表公之阡惜哉茫茫四海何處覓公之墓田惟有表遺烈以遠方之逖聽而致傲於官聯吾知數十年後瞻遺像而肅拜者必曰此亦張巡許遠之儔而光生豆籩彼喪師失地者徒傷乎運蹇而安得與我公比肩公亦可以瞑目人間栖神祠宇儼然抗正氣於坤乾嗚呼哀哉尙饗聞此文係出楊羨門先榮之手牛君嘗謂當日牛鑑由上海逃回密諭所屬英船所過不必驚懼惟力勸富戶以牛羊銀米犒師此熊文燦恐壞撫局之故智耳牛恐海副都統執滯故不與一議和事海亦不知當事之謀以爲城外有參贊

提督大兵。我但閉門搜殺漢奸而已。漢奸二字。當日用以對付敵人。言海竟誤以爲對滿州駐防。言其顛預。可想而知。然使其突梯滑稽。與要人比。則吾郡亦降城耳。平心論之。海亦庸中之佼佼者也。噫。按此文頗似明末某名士祭阮光祿大鉞文。擲掄備至。雖係祭文。實則一篇罪案也。

蒙古風俗

光緒戊申。余友錢君有東三省之行。因得徧歷東蒙各地。悉其風俗。歸以語余。記之如左。自郭爾羅斯起。經科爾沁。巴林二旗。以達多倫。皆東四盟遊牧地。馬牛羊徧野皆是。近地往來多用驢車。蒙古人性嗜酒。常食爲油麥麵。日一餐。午前但啜乳茶。用甌茶置鍋煎之。納炒黃米一握及牛乳。男婦大小共飲之。日晡始食黃米。卽黍也。蒙古人恆炒以入茶。我等過其地。亦出其炒米。牛乳乳皮相贈。蒙古人喜鼻煙。懷中各有鼻煙囊。無論相知與否。但入門卽取鼻煙相敬。客亦探懷取壺反敬。余不能吸鼻煙。以主人相敬取少許。甫觸鼻端。已大鼾。蒙古人大笑。一見卽爲具食。留宿同伴張君爲言。我等雖爲客。飲食時。蒙古人在側。亦必分界之以見情好。雖人多亦必各給少許。餞餘無嫌也。其

風俗質厚如此。婦人生子恆就野外以室中供有神位。懼褻神也。兒生浴以冰雪。謂長大方能耐冷。其筋骨之堅強有由來矣。薪蒸雜牛馬糞燒之。其富者乃用稿秸千里不見條枚。故得薪甚難。然牛馬糞值陰雨。熬之溼。每不成炊。幸乾燥日期多耳。蒙古各地馬牛羊糞及人糞。均有人收拾販賣。其牲畜皆散放。故其糞暴乾。燒之無臭。氣經棚西南多倫設有巡檢及同知。其地本蒙人牧地。後經漢人來此開墾。遂見繁盛。其人皆從燕齊而來。業農種植者爲油麥小麥雅片。其白麵（卽小麥麵）及雅片煙則販至外埠。本地莊戶專食油麵。或以白麵蕎麥雜食之。市用之錢每百名五十實則祇三十五文。張君爲言庚子年聶功亭軍門所部武衛軍當津沽之亂。有自蘆臺出關外者。至哈達（卽赤峯縣）大掠而西。初祇二三百人。旣而裹脅愈多。過經棚幸白岔巡檢文君先期與約。過境時款接之入市。毋擾其首領。如約果入市。肅然但斂資爲具。衣食相得甚歡。居數日乃西去。余經過其地時曾遇盜十餘人。將銀物刼掠去。從人受槍洞穿右股。幸遇同鄉屠君在彼。贈以衣物資斧。始不告困。盜多操山東曹兗二州口音。乃傭工於莊戶者也。秋深百穀登場。莊主不能贍養。則償其。夏秋之值而遣之。其人好賭博。揮

霍。無。以。自。存。乃。爲。盜。云。

得勝陀

吉林有得勝陀。金太祖起兵誓師之地也。滿洲語曰額特赫噶珊。額特赫。勝也。噶珊。鄉村也。相傳金太祖攻黃龍府。次混同江。無舟以渡。金主使一騎前導。乘赭白馬。徑涉曰視吾鞭所指而行。諸軍隨之以濟。遂克黃龍府。後使人視其渡處。深不可測。故老相傳渡處卽今五家子站門前松花江道光五年。吉林將軍富俊奏准伯都訥閑荒松佃認墾。取租勘文。至五家子站北荒地。發見大金得勝陀碑頌。始知故老遺傳之有所本。其得勝陀碑頌。係奉政大夫充翰林修撰同知制誥兼太常博士驍騎尉賜緋魚袋臣趙可奉敕撰。儒林郎咸平府清安縣武騎尉賜緋魚袋臣孫侯奉敕書丹。承直郎應奉翰林文字同知制誥兼充國史院編修官雲騎尉賜緋魚袋臣黨懷英奉敕篆額。其文云。得勝陀太祖武元皇帝誓師之地也。臣謹按實錄及睿德神功碑云。太祖率軍渡洮流水。命諸路軍畢會太祖。先據高阜。國相撒改與衆仰望聖質如喬松之高。所乘赭白馬亦如岡阜之大。太祖顧撒改等人馬高大亦悉異常。太祖曰。此殆天地協應。吾軍勝敵。